

## 2-bob. Oilaviy huquqlarni amalga oshirish va himoya qilish

### 10-modda. Oilaviy huquqlarni amalga oshirish va oilaviy majburiyatlarni bajarish

Fuqarolar oilaviy munosabatlardan kelib chiqadigan huquqlarini o‘z xohishlariga ko‘ra tasarruf etadilar.

Oila a‘zolarining o‘z huquqlarini amalga oshirishlari hamda o‘z majburiyatlarini bajarishlari oilaning boshqa a‘zolari va o‘zga shaxslarning huquqlari, erkinliklari va qonuniy manfaatlarini buzmasligi shart.

*Qarang: O‘zbekiston Respublikasi Konstitutsiyasining 20-moddasi.*

### 11-modda. Oilaviy huquqlarni himoya qilish

Oilaviy huquqlarni himoya qilish sud tomonidan fuqarolik sud ishlarini yuritish qoidalari bo‘yicha, ushbu Kodeksda nazarda tutilgan hollarda esa, vasiylik va homiylik organlari yoki boshqa davlat organlari tomonidan amalga oshiriladi.

*Qarang: O‘zbekiston Respublikasi Konstitutsiyasining 44-moddasi, O‘zbekiston Respublikasining Fuqarolik protsessual kodeksi, O‘zbekiston Respublikasining “Vasiylik va homiylik to‘g‘risida”gi Qonuni.*

Oilaviy huquqlarni himoya qilish ushbu Kodeksning tegishli moddalarida nazarda tutilgan usullarda amalga oshiriladi.

## 12-modda. Oilaviy munosabatlarda da'vo muddatining qo'llanilishi

Oilaviy munosabatlardan kelib chiqadigan talablarga nisbatan da'vo muddati joriy qilinmaydi, ushbu Kodeks bilan belgilangan hollar bundan mustasnodir.

*Qarang:mazkur Kodeksning 27-moddasining to'qqizinchi qismi, 136-moddasi birinchi, to'rtinchi qismlari, 139-moddasi uchinchi, to'rtinchi qismlari, O'zbekiston Respublikasi Fuqarolik kodeksining 12-bobi.*

Da'vo muddatini belgilovchi normalarni qo'llashda sud O'zbekiston Respublikasi Fuqarolik kodeksiga amal qiladi.